

青鹿
村皮
遺子
稿集



黃樓
村史
書
編



青
村
遺

稿
附錄

金
涓
撰

中
華
書
局

Iw44/1002

叢書集成初編

鹿皮子集（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

青
村
遺
稿

此 據 金 華 叢 書 本
排 印 初 編 各 叢 書
僅 有 此 本

序

詩以言志者也。志趣不高，其詩必墮凡近。詩又本性情者也。性情不冲澹蕭散，其詩必多矜氣少坦懷。故觀其志之所存，與其性情之所發，而其詩可知。卽其人之品亦因以定。吾郡金德原先生，生值元季，師友皆極一時之選，甚有時譽矣。而少無宦情，遁跡邱園。雖見知於虞學士、柳待制，交相推薦，皆辭不就。逮入明初，復堅拒州郡辟命，教授鄉里，以終。余高先生之爲人，求其遺集，頻年不獲。今年七月，得孫琴西方伯遜學齋所藏抄本，忻喜無量。伏而讀之，其詩模範山水，陶冶性靈，亭亭物表，矯矯霞外。非夫志趣超曠，性情閒適，有得於中，無營於外者，烏能詣此。四庫書目稱其品格在江湖詩以上，亮哉。爰亟繙梓，以永其傳。遜學齋本，從其初姓題曰劉涓撰。今仍依書目著錄。易劉爲金云。光緒二年丙子冬十月，郡後學胡鳳丹、月樵甫識於鄂垣之退補齋。

青村遺稿序

青村翁生勝國之末。當高皇帝龍飛江左。其同學宋文憲。王忠文輩。皆以才望聯翩並進。爲開國羽儀。翁獨夷然不屑。屢違徵辟。高臥烟霞。絕無貢禹彈冠之慕。蓋所謂確乎不拔者非耶。惜其著述散佚。僅得遺詩什一於千百之餘。氣清深而格醇正。使讀之者挹其流芬。猶足廉貪夫立懦志。信真儒之作。不徒矜聲律於風雲月露間也。嗟乎。士君子立身貴特立耳。意有所不可。則雖加以邦有道貧且賤焉之恥而不顧。彼奔走富貴。借口於聖人之一說。以自便其私者。寧不賴有餘泚哉。是集行則天下咸識先民矩度。于今日營競場中。下一帖清涼飲子。不獨有功於翁。抑可謂有功於名教矣。堡幸託族屬。仰止高風。奉以周旋。庶幾不敢爲苟且功名之事。所賴裨益良多。而吾宗羣從。學有淵源。無貽失墜。以光大先人德業者。尤願交相勗焉。若徒借以資筆墨供吟嘯而已。則失之遠矣。崇禎癸未九秋。賜進士出身。前知臨清州事。武陵族子堡頓首謹敘。

青村先生小傳

浦江鄭栢

金涓字德原義烏人受經於許謙學文於黃潛淹貫經傳卓識過人隱居青村學者稱爲青村先生州郡薦辟輒懇辭謝曰懷尊青黃豈木所願耶吾髮已種種焉能驅馳簪組之間哉日游詠乎山水以終其身贊曰栢觀朱太史記青村隱居稱涓爲安貞肥遯之士考其德而求其行信足有徵焉

右見金華賢達傳

祭青村先生文

嗚呼先生。生於皇明盛世。家道昌隆。既富且庶。當其伯仲。一掌於金穀。唯先生向學。乃專心而致志。歲寒亭上。立雪已深。白雲軒外。春風和氣。斯時同門者百數十人。獨先生稱爲入室高弟。先生自少有志於濟貧恤孤。遠邇饑寒。賴先生而活者。不可數計。先生之配。雙失其明。衆勸再聘。而先生酷以前定。而心不少二。此皆先生大異於世人。而世人莫能窺先生之涯際。先生自爲童子時。出語長老。悉已驚悸。既長。學乎六經。其文章簡古而純粹。毅然不仕。隱於青村。以避名勢。借使用之於朝廷。必作爲雅頌歌咏。皇明之功義。薦之清廟。必上追商周魯頌之隆治。奈何終不出。而立後學之標幟。先生之子若孫。亦嘗爲顯官。而先生弗克享其祿而傾逝。可宗蚤歲。亦執經而造講席。賴先生口授聖賢之遺意。今者宦轍四方。職乃充於卑位。先生沒廿有餘載。未嘗不感時懷思。而汪然殞涕。尙饗門人王可宗。

青村遺稿後序

金別駕儒元先生忘其年而交於予。於茲餘二十年矣。嘗謂予曰。吾與子通家之好也。吾先世青村先生。從子先世文獻公遊最久。惜乎其所爲詩文多散落。吾於先世舊隱處及舊交遊家搜訪。僅得一二。言之若戚然有遺憾焉者。因出示予。予讀之。見其俊拔而清和。淵深而嚴愼。宛然先世家法也。相與慨嘆久之。後數年。爲正德辛巳。予應貢上京。恭遇今上皇帝入繼大統。萬幾暇。廷賜試事竣。分南北。人入監。予轉而別駕公之子孔殷。已在監。半載矣。出入與之俱。及撥歷冬官部事。又同焉。相與甚洽。予亦不知吾年之長於孔殷也。一旦謂予曰。吾先世所遺詩文若干篇。首恨不多。將梓之以壽其傳可乎。予曰。可。奚有於是。嘗之玉焉。所積嘗累櫝矣。歲久淪逸。存者不一二。得之亦足爲寶。況可因此以知其他玉之皆良。奚有於是。孔殷於是繕寫成帙。請予文以序。予先世薨時。襄後事。哀集遺文。爲之請於官。以建祠宇而紀之。青村先生輒與焉。則其生事。吾先世可知矣。此予所願欲酬焉而未能有也。今其後世以文來請。予惡忍辭。予惟斯稿之散之藏之晦。百數十年後。卒有賴於別駕父子而聚而傳而顯。是固有時。而別駕父子之賢。亦不可掩矣。使別駕父子之後。代有別駕父子者出。則斯稿之傳。寧有窮乎。抑予於斯有感焉。予與別駕父子之先世爲師生。而予又與別駕父子爲今日之交。予之後。亦有能於斯帙之後綴一辭。以不忘其所謂通家之好者耶。崇嘉靖三年七月。同里黃端寓留都序。

青村遺稿

元金 涓撰 郡後學胡鳳丹月樵校梓

序

送楊仲章歸東陽詩卷序

楊君仲章以清峻修敏之質，好學不倦，窮討六籍，雖晚登先師黃文獻公之門，而強記卓識，邁倫逸等。一時學者咸推先登。宋君景濂每稱之曰：「能而先師亦自謂不意晚年復得此友。」如涓者愚弗能殫頑弗能訂，安敢望其末光也哉？重自念四方士人登先師之門者，無有不立名成業，涓自幼年侍側時，則有陳君時甫、吳君立夫、李君仲倫、朱君元達，朝夕講論文字，辨析義理，涓未始或能識知也。既而時甫居東陽，以明經授徒，常數十百人，弟子不遠百里而至，其高第弟子則有張君良金，爲江浙鄉舉易魁，凡爲舉子之業者，無不宗焉。立夫以庚申歲中鄉試，榜仲倫以茂才異等，用大臣薦爲校官，惟元達豪俠不羈，遷視進取，以學問文章同遊浙西者三十餘年，雖虞、柳諸公薦書交上，亦睥睨弗顧也。後數年，先師提舉江浙儒學時，則有劉君子實、哲君子正，應君之邵，陳君子中，肄業西湖書院，劉、哲二君皆登上第，應則兩中鄉舉。榜陳回河南授試主司，見其文，反疑其爲南人代筆之作，由是失利而返，則抑鬱不得志，卒於錢塘。先師銘其墓焉。迨夫先師告老致事而歸，則有宋君景濂、許君存仁、王君子充，以英敏絕人之學，一時咸集，文名德業超出前輩，今則皆居要路，密邇清光，所謂立名成業，真足以承前引後，嗚呼盛哉！夫何朱君伯清

傅君國章與吾仲章氏皆以妙年傑學才器局幹以出入乎諸公之間。遂遂焉不以印組爲務。忒忒焉不以文章自高。晦光隱德。逸志抗雲。迥出人表。比辟書及門。伯清以居制不出。國章以母老懇辭。仲章則先事適機。以自潛。時知縣胡公子實方興學校以導民。奉幣致請。仲章爲弟子師。迎焉以備其敬。館焉以具其禮。無幾何致辭而歸。咸贈之以詩。去則隱于東陽南溪之濱。閉門絕客。束書問農。文不畱稿。詩不贈人。與涓不相聞問者。寥寥四五載矣。今其季仲齊授徒法興精舍。涓適見此卷。慨後生之可畏。嗟良覲之難逢。痛念先師之不可復作矣。因撫卷興思。先師以晚年得此友爲喜。而涓亦以晚年得友斯人爲奇。則先師道業之傳宗而主之者有其人。予復何憂。遂并敘此意于卷端。以寓夫久要不忘之意云。仲章見之。必有以知我屬望之深意也。

詩

七言古風

和吳正傳五臺懷古韻

姑蘇臺

闔閭城畔姑蘇臺。百花洲上千花開。笙歌半空曉未絕。一聲落月啼烏來。蛾眉顰翠愁如簇。空捧春嬌在心曲。滄江羅網縱鯨鯢。碧瓦坵墟走麋鹿。悽烟慘日潮生處。怨滿鴟夷猶不悟。甬東東海不可棲。劍光夜冷吳山路。

章華臺

楚臺雲棟連天宇。伯氣憑陵橫九土。方會諸侯求鼎時。天下無周而有楚。一朝吳蔡兵合謀。孤舟江路誰從遊。宮花曉露細腰泣。空山落日餓鬼愁。春風過眼秋蕭瑟。餽人一飯那能得。道傍塊土棲草烟。夜寒夢落空臺前。

朝陽臺

楚王昔日遊臺上。前望巫峰近相向。青楓錦石叢古祠。暮雨朝雲依疊嶂。蔓花古木多春寒。翠幃仙佩非人間。神功治水佐禹跡。至今石刻巍如山。詞臣錯寫高唐賦。剛道朝雲夢中遇。千尺黃湍洗不清。水聲猶望臺前怒。

黃金臺

昭王有志興宗社。厚幣卑辭禮賢者。郭君一語捐千金。國士爭趨駢駟馬。燕臺計議皆英豪。齊人蹴踏猶兒曹。三軍旗幟白日動。半空劍氣青雲高。樂生既去士亦少。回首春風長芳草。火牛遂復七十城。恨滿臺荒天地老。

戲馬臺

將軍逐馬關中來。神威掠地風雲摧。鴻門舞劍成敵國。彭城衣錦空登臺。馳下漢軍何披靡。垓下楚歌相應起。山河百二幾諸侯。子弟八千無一騎。古來天下誰英雄。荒臺老樹悲秋風。符命合歸赤帝子。項伯不

忠范增死。

五言律詩

和楊仲齊韻

光明清絕地。物色藉詩描。野鼠拱虛穴。山蜂歸早朝。閑庭飄芍藥。枯木引陵苕。鼻觀香風入。移時獨未消。

其二

雲嶠無榮辱。林泉得浸淫。瀑飛晴雨散。風奏曉龍吟。大葉長莖蒜。枯枝老樹林。吾行忽過此。殊喜得幽尋。

其三

渴飲空中露。饑飡石上霞。夜茶烹玉液。春酒釀松花。自謂得仙術。不知老歲華。請看梳櫛處。斑白照窗紗。

其四

溪行欲假屨。雲坐不須冠。樹密一天小。樓高六月寒。袈裟憎客至。麈尾喜人看。惟有松無意。風來卽奏彈。

自述

疆場正多故。山林成久留。據鞍皆戰馬。扣角且歌牛。清德交遊冷。光明詩思浮。從今脫塵濁。自可鄙公侯。

春興

菜甲時堪摘。柴荆晝不開。鑿渠通水活。度地覓花栽。旅食憑儒術。春愁仗酒盃。卻憎塵世薄。徒爾暫徘徊。

其二

落落相如志。悠悠王粲悲。乾坤猶甲冑。耕鑿且年時。伐木開新逕。引泉添小池。箇中非所適。排悶且裁詩。

其三

草閣成遷次。春來景物新。杖藜時野外。把釣即溪濱。夜雨桑麻足。東風草木勻。關河阻南北。何處問通津。

秋夜

四望秋無際。凭闌夜未央。星榆晴舞葉。月桂冷飛香。人澹琴心苦。林幽鶴夢長。此情當此夕。誰肯賞淒涼。

山莊

青村溪盡處。林密隱孤莊。石老莓苔路。門荒薜荔牆。人行秋葉滑。鶴立晚松涼。治畝農歸後。蓑衣挂夕陽。

江村

寂寂江村路。輕烟晚自生。遠峰晴見色。獨樹煖無聲。渚鷺行看水。溪魚賣入城。孤舟人不渡。兩岸夕陽明。

錢塘行在

鳳舞龍飛處。寒烟半野蒿。地卑東海近。天遠北辰高。來往春秋燕。盈虛日夜潮。老僧年八十。對客話前朝。

伍員廟

東出昭關日。倉皇去路遙。漁人憐贈劍。市吏識吹簫。楚郢鞭荒墓。吳江起怒潮。因思臣子節。千古一魂消。

舟次漁浦

雙溪東入浙。終日坐危舟。流水遠明目。小篷低壓頭。烟村鴉入暮。江國鴈賓秋。一片淒涼景。安排獨客愁。

浙江曉渡

片帆風力飽。涼氣碧颼颼。江闊欲沈鴈。天空惟見秋。漁歌聞四起。人影在中流。隔望秦峯出。東南第一州。

舟次嚴灘

八月桐江曲。青蘋未著花。亂雲低壓樹。細水淺流沙。到郭無多路。依山有幾家。故人成遠別。相望各天涯。

雨後書懷

畏俗久不出。其如此意何。鬢毛詩白盡。山色雨青多。曲偃行蛇草。圓生浴鳥波。與誰專一壑。同和採芝歌。

康湖山居

康湖環十里。半世樂吟身。白屋居寒士。青山是故人。松多天不暑。瀑近地無塵。頗得漁樵趣。生涯日又新。

送人回剡

華川遊未遍。又作剡中游。詩海珊瑚月。書田苜蓿秋。行山時借屐。訪雪夜乘舟。別後懷人處。清風獨倚樓。

別徐處士歸嚴州

浙水連天白。輕帆帶雨飛。楊懸高士去。釣在故人歸。秋盡鴈初過。江空魚正肥。君如招伴隱。我正欲相依。

別友人歸衢

爛柯山下路。猿鳥待多時。今伴少微隱。何愁太史知。葛陂龍化早。遼海鶴歸遲。爲問山中叟。如今幾局棋。

送友曉發赴北

荒雞三唱後。河漢正西流。太白孤星曉。中華大野秋。樹低江郭遠。風急草烟收。此去金臺上。觀光樂勝遊。

客中與里人言別

同是婺中人。情親若弟兄。客邊今識面。詩上已聞名。驛柳分春遠。山花照晚明。相逢卽相別。流水幾多情。

旅懷

江湖爲客久。歸計與誰論。春色草無路。雨聲人閉門。薄衣知酒煖。病眼覺燈昏。蜀水家邊景。連宵役夢魂。

江樓有見

睡起無忙事。寒多不下樓。櫓聲和鴈去。江影照人愁。山碧人初曉。林紅葉正秋。琴書無恙否。我欲問歸舟。

山園卽事

暖日麗亭臺。山屏四面開。與誰行樂去。有客伴吟來。風舞摩娑竹。龍蟠屹嶮梅。春風似相識。終日共徘徊。

自述

索居三十載。一硯鏡穿磨。學淺非時用。人生奈老何。竹房來暝早。花塢聚春多。靜坐無餘事。門前水自波。

次楊仲齊韻

端坐無時事。春秋讀聖經。逐風驚退鷁。隕石看飛星。自謂心將慣。何期眼倍青。獲麟應絕筆。三歎動虛靈。

其二

空谷開雲葉。清池曳水衣。堦苔掃不盡。山果摘還稀。長嘯妨僧定。徐行看月輝。獼猴庭下過。擾亂靜中機。